

**BOSNA I HERCEGOVINA
FEDERACIJA BOSNE I HERCEGOVINE
VLADA**

PRIJEDLOG

**ZAKON
O IZMJENAMA I DOPUNAMA
ZAKONA O STRANIM ULAGANJIMA**

Sarajevo, maj 2015. godine

**ZAKON
O IZMJENAMA I DOPUNAMA
ZAKONA O STRANIM ULAGANJIMA**

Član 1.

U Zakonu o stranim ulaganjima („Službene novine Federacije BiH“ br. 61/01 i 50/03) u članu 1. stav 2. iza broja :“17/98“ dodaje se zarez i brojevi: „13/03, 48/10 i 22/15“.

Član 2.

U članu 2. alineja sedam mijenja se i glasi:

„- medijski poslovi“.

Iza alineje sedam dodaje se nova alineja osam koja glasi:

„-poslovni subjekt“.

Član 3.

U članu 3. stav 2. riječ: “glavnica“ u različitom padežu zamjenjuje se riječima: „osnovni kapital“ u odgovarajućem padežu, a riječi: „javnim informisanjem“ zamjenjuju se riječima: „medijskim poslovima“.

Iza stava 2. dodaje se novi stav 3. koji glasi:

“Vlada Federacije BiH može na prijedlog nadležnog ministarstva, ukoliko ocijeni opravdanim, donijeti odluku da ulog stranog lica u određenim privrednim društvima iz stava 2. ovog člana, ne podliježe restrikciji navedenoj u stavu 2. ovog člana, a sve u skladu sa propisima kojim su regulisane ove oblasti.”.

Član 4.

U članu 7. iza stava1. dodaje se novi stav 2. koji glasi:

„Transakcije iz stava 1. ovog člana vrše se putem komercijalnih banaka po ispunjenju svih poreznih i drugih zakonom propisanih obaveza po osnovu javnih prihoda u Bosni i Hercegovini i Federaciji BiH.“.

Član 5.

Član 9. mijenja se i glasi :

“Strana ulaganja će biti oslobođena plaćanja carina i carinskih obaveza, ukoliko drugačije nije propisano odredbama Zakona o carinskoj politici Bosne i Hercegovine (“ Službeni glasnik BiH” br.57/04, 51/06, 93/08, 54/10 i 76/11).

Strana ulaganja mogu biti oslobođena plaćanja poreskih obaveza u skladu sa odredbama zakona koji uređuju poresku politiku u Federaciji BiH.”.

Član 6.

U nazivu poglavlja III. riječi: “ OBLICI STRANIH ULAGANJA” zamjenjuju se riječima: “SAVJET ZA STRANE INVESTITORE FEDERACIJE BOSNE I HERCEGOVINE”.

Član 7.

Član 10. mijenja se i glasi:

“Radi pomaganja i podsticanja stranih investicija i unapređivanja ukupnog poslovnog ambijenta za strane investitore u Federaciji BiH, potpunije koordinacije i saradnje institucija federalnog, kantonalnog i lokalnog nivoa u oblasti stranih

investicija, kao savjetodavno tijelo Vlade Federacije BiH, osniva se Savjet za strane investitore Federacije Bosne i Hercegovine (u daljem tekstu: Savjet).”.

Član 8.

Iza člana 10. dodaju se novi čl. 10a.i 10b.koji glase:

“ Član 10a.

Zadaci Savjeta su:

- analiza poslovnog okruženja za strane investicije i predlaganje preduzimanja mjera i postupaka radi otklanjanja prisutnih ograničavajućih faktora za strane investitore,
- iniciranje izmjena zakona i drugih podzakonskih akata kojima se podstiču i olakšavaju strana ulaganja,
- razmjena informacija i iniciranje potpunije saradnje između institucija federalnog, kantonalnog i lokalnog nivoa, radi stvaranja povoljnijeg poslovnog ambijenta za strane investicije, koji će stranim ulagačima investiciona ulaganja učiniti privlačnim i sigurnim, i
- konsultacije sa domaćim i stranim ulagačima radi iznalaženja rješenja za poticanje investicija,
- uspostavljanje saradnje između institucija Federacije BiH, kantona i jedinica lokalne samouprave i postojećih i potencijalnih stranih investitora radi prevazilaženja eventualnih poteškoća prilikom realizacije investicija, što bi služilo kao efektivan mehanizam servisiranja investitora i podrške pri investiranju.

Član 10b.

Savjet ima najmanje 16 članova, koje imenuje Vlada Federacije BiH na prijedlog federalnih ministarstava, Privredne komore Federacije BiH i stranih investitora.

Članovi Savjeta sastajat će se po potrebi, a najmanje jedanput svako šest mjeseci kako bi koordinirali aktivnosti, adresirali i izanalizirali aktuelna pitanja, te razmatrali ostala pitanja iz svoje nadležnosti.

Tehničko-administrativne poslove za Savjet obavlja Federalno ministarstvo trgovine. Za svoj rad članovi Savjeta neće primati naknadu.”.

Član 9.

Član 11. mijenja se i glasi:

„U Federaciji BiH strana ulaganja u Sektore koji podliježu restrikciji odobrava Vlada Federacije BiH na prijedlog Federalnog ministarstva energije, rudarstva i industrije i na prijedlog Federalnog ministarstva prometa i komunikacija, svakog u okviru svoje nadležnosti (u daljnjem tekstu: nadležno ministarstvo).

Za ulaganje u Sektore koji podliježu restrikciji strani ulagači su dužni Vladi Federacije BiH, putem nadležnog ministarstva, podnijeti zahtjev za odobravanje stranog ulaganja.

O zahtjevu iz stava 2. ovog člana Vlada Federacije BiH će donijeti odluku u roku od 30 dana od dana prijema urednog zahtjeva.

Ako postoje razlozi za odgodu donošenja odluke nadležno ministarstvo će o tome obavijestiti podnosioca zahtjeva u dodatnom roku od 30 dana.

Vlada Federacije BiH dužna je donijeti odluku, sa obrazloženjem i dostaviti je stranci, najkasnije u roku od 60 dana od dana prijema urednog zahtjeva.

U slučaju nedonošenja odluke u roku iz stava 5. ovog člana strano ulaganje se smatra odobrenim..
Odobrenje stranog ulaganja važi bez vremenskog ograničenja.“

Član 10.

U članu 13. stav 4. se briše.

Član 11.

Ovaj Zakon stupa na snagu osmog dana od dana objave u „Službenim novinama Federacije BiH“.

**OBRAZLOŽENJE
ZAKONA O IZMJENAMA I DOPUNAMA
ZAKONA O STRANIM ULAGANJIMA**

I.- USTAVNI OSNOV ZA DONOŠENJE ZAKONA

Ustavni osnov za donošenje ovog Zakona sadržan je u članu III.1. tačka b) koji je izmijenjen amandmanima VIII, LXXXIX i CVI Ustava Federacije Bosne i Hercegovine prema kojima je u isključivoj nadležnosti Federacije Bosne i Hercegovine utvrđivanje ekonomske politike, uključujući planiranje i obnovu, te politiku korištenja zemljišta na federalnom nivou i člana IV.A.20 (1) d) Ustava Federacije Bosne i Hercegovine, prema kojem je Parlament Federacije Bosne i Hercegovine, između ostalog, nadležan za donošenje zakona o vršenju funkcija federalne vlasti.

II.- POSTOJEĆE STANJE I RAZLOZI ZA DONOŠENJE ZAKONA

Zakon o politici direktnih stranih ulaganja u Bosni i Hercegovini („Službeni glasnik BiH“ br. 17/98, 13/03, 48/10 i 22/15) je osnov za utvrđivanje politika direktnih stranih ulaganja u Bosni i Hercegovini.

U skladu sa ustavnim nadležnostima i u skladu sa tim Zakonom u Federaciji BiH je donesen Zakon o stranim ulaganjima („Službene novine Federacije BiH“, broj 61/01 i 50/03) kojim se detaljnije uređuju pitanja koja se odnose na obaveze ulagača, te ona koja se odnose na sektore u kojima postoje određena ograničenja za strane ulagače. Federalni Zakon nije usklađivan sa Izmjenama i dopunama Zakon o politici direktnih stranih ulaganja iz 2010. god. jer je Vlada Federacije BiH nakon što je na svojoj 63. sjednici usvojila Nacrt Zakona o izmjenama i dopunama zakona o stranim ulaganjima isti povukla iz parlamentarne procedure.

Razlog za povlačenje Nacrta Zakona iz parlamentarne procedure je bila preporuka Ureda IFC-a u BiH da se odgodi donošenje tog Zakona do usvajanja preostalih preporuka po Izvještaju o analizi utjecaja propisa, kako bi se obezbjedilo istovremeno usvajanje i unapređenje propisa na svim nadležnim nivoima vlasti u Bosni i Hercegovini.

Kako je Parlamentarna Skupština Bosne i Hercegovine 05. marta 2015. god. usvojila Zakon o izmjenama i dopunama Zakona o politici direktnih stranih ulaganja u Bosni i Hercegovini („Službeni glasnik BiH“ broj: 22/15) potrebno je izvršiti usklađivanje propisa u ovoj oblasti.

Predložene izmjene i dopune Zakona vrše se u cilju usklađivanja federalnog propisa sa Izmjenama i dopunama Zakona o politici direktnih stranih ulaganja u Bosni i Hercegovini („Službeni glasnik BiH“ broj: 48/10) i Izmjenama i dopunama Zakona o politici direktnih stranih ulaganja u Bosni i Hercegovini („Službeni glasnik BiH“ broj: 22/15) .

III.- OBRAZLOŽENJE PREDLOŽENIH RJEŠENJA

Članom 1. Predloženog zakona izvršena je dopuna člana 1. stav 2. Zakona u kojem se poziva na primjenu odredbi Zakona o politici direktnih stranih ulaganja u BiH, te su u ovoj dopuni navedeni brojevi "Službenog glasnika BiH" u kojim je taj propis objavljen.

Članom 2. vrši se usklađivanje izraza sa izrazima iz člana 2. Zakona o politici direktnih stranih ulaganja u BiH.

Članom 3. vrši se usklađivanje sa članom 4. stav (f) Zakona o politici direktnih stranih ulaganja u BiH.

Članom 4. vrši se usklađivanje sa članom 11. Zakona o politici direktnih stranih ulaganja u BiH.

Članom 5. stav 1. vrši se usklađivanje sa članom 10., a stavom 2. sa članom 9. stav (a) Zakona o politici direktnih stranih ulaganja u BiH,

Čl. 7. i 8. predviđeno je osnivanje Savjeta za strane investitore na nivou Federacije BiH, njegova nadležnost, organizacija i druga pitanja od značaja za rad Savjeta. Uspostavljanje Savjeta omogućava koordinaciju sa svim nivoima vlasti u Bosni i Hercegovini i koordiniran pristup radu sa investitorima.

Članom 11. određena je nadležnost Vlade Federacije BiH za odobrenje ulaganja u Sektore koji podliježu restrikciji, te su određena federalna ministarstva koja obrađuju zahtjeve i sačinjavaju prijedlog odluke o odobrenju ulaganja u ove sektore. Rok za rješavanje zahtjeva usklađen je sa članom. 4. stav (d) Zakona o politici direktnih stranih ulaganja u BiH.

IV. FINANSIJSKA SREDSTVA

Za provođenje ovog zakona nisu potrebna dodatna finansijska sredstva u Budžetu Federacije BiH.

OBRAZLOŽENJE PRIJEDLOGA ZA DONOŠENJE ZAKONA PO HITNOM POSTUPKU

Ovim Zakonom vrši se usklađivanje Zakona o stranim ulaganjima („Službene novine Federacije BiH“ br. 61/01 i 50/03) sa Zakonom o politici direktnih stranih ulaganja u Bosni i Hercegovini („Službeni glasnik BiH“ br. 17/98, 13/03, 48/10 i 22/15).

Za donošenje ovog Zakona postoji neodgodiva potreba imajući u vidu da se radi o reformskom zakonu koji sadrži rješenja koja će poboljšati poslovni ambijent za strana ulaganja u Federaciji BiH, a bez novih direktnih stranih ulaganja svakako mogu nastupiti štetne posljedice po ekonomski razvoj Federacije BiH.

Stoga, postupajući u smislu odredaba člana 26. Poslovnika o radu Vlade Federacije Bosne i Hercegovine – Prečišćeni tekst (“Službene novine Federacije BiH” br. 6/10, 37/10 i 62/10) predlažemo donošenje Zakona o izmjenama i dopunama Zakona o stranim ulaganjima po hitnom postupku obzirom da su u konkretnom slučaju ispunjeni uslovi iz člana 191. stav 2. Poslovnika Predstavničkog doma Parlamenta Federacije Bosne i Hercegovine (“Službene novine Federacije BiH” br.69/07 i 2/08) i člana 186. stav 2. Poslovnika o radu Doma naroda Parlamenta Federacije Bosne i Hercegovine (“Službene novine Federacije BiH” br.27/03 i 21/09).